



## GRISCHUN

# Succurs d'enviern ha sustegnì 490 persunas

Il Succurs d'enviern dal Grischun ha impundì var 136'000 francs per prestaziuns materialas e finanzialas l'onn da gestiun 2023/2024. Sco la fundaziun scriva en ina communicaziun als meds da massa, han var 490 persunas profità da las prestaziuns.

Il Succurs d'enviern dal Grischun ha approvà 157 dumondas da sustegn durant l'onn da gestiun 2023/2024. 106 da las dumondas approvadas èn vegnidas inoltradas da famiglias u da famiglias d'in genitur. Las ulteriuras 45 dumondas èn vegnidas da persunas singulas u da pèrs senza uffants. Tut en tut han var 490 persunas profità da las prestaziuns dal Succurs d'enviern dal Grischun, hai num en ina communicaziun da quest mardi.

### Differentas prestaziuns

Il succurs è s'engaschè l'onn passà per exempel per fatgs finanzials, cun l'acziun da Nadal, bons per velos, vestgadira, letgs, entradas en il «Zauberwald Lenzerheide» u la visita ad in gieu da hockey. La consegna da bons per la bursa da velos a Cuira che ha lieu la primavaira e l'atun, è fitg bainvegnida ed è era vegnida nizzegiada savens l'onn da gestiun 2023/2024. En tut èn vegnids distribuids 185 bons per velos. Prestaziuns materialas sco satgs da scola, pachets da vestgadira ed era letgs èn vinavant contribuziuns da su-

stegn bainvesidas dal Succurs d'enviern dal Grischun. Medemamain han var 350 famiglias, pèrs e persunas singulas survegnì ina surpraisa da Nadal en furma d'ina pitschna summa da danners. L'onn da gestiun 2023/2024 ha il Succurs d'enviern dal Grischun impundì var 136'000 francs per prestaziuns materialas e finanzialas.

### Autonom dapi 1995

L'onn 1995 è il Succurs d'enviern dal Grischun daventà autonom ed è vegnì transferì en ina fundaziun. Il deputà *Maurus Tomaschett* presidescha la fundaziun. *Barbara Gujan-Dönier* è vicepresidente. Plinavant fan part dal cussegl da fundaziun il cusseglier guvernativ *Martin Bühler*, la deputada *Julia Müller* ed il deputà *Rico Kienz*. Pli baud devi en Svizra fitg bleras persunas senza lavur. Questa situaziun ha chaschunà ina gronda miseria. Per gidar las persunas pertutgadas da povradad, è vegnì fundà il Succurs d'enviern. Dapi lura è sa midà bler. Ma la povradad è restada, era sch'ella n'è savens betg visibla. (cdm/rtr/fmr)